


菩薩瓔珞本業經

下

二百六
念六

48823



Vertical text strip containing illegible characters, possibly a library or archival stamp.

菩薩瓔珞本業經卷下

姚秦涼州沙門竺佛念譯

釋義品第四

尔時佛告敬首菩薩汝先言云何義相者所謂十住十行十迴向十地無垢地妙覺地義相今當說佛子是金剛海藏瓔珞中

相義義出體體者菩薩體義名功德法一切菩薩為體為義故名體義



佛子發心住者是人從始具縛凡夫未識三寶聖人未識好惡因之以果一切不識不解不知佛子從不識始凡夫地值佛菩薩於教法中起一念信便發菩提心是人尔時在

名信想菩薩亦名假名菩薩亦名名字菩薩
其人略行十心所謂信心念心進心定心慧
心戒心迴向心護法心捨心願心復有十心
所謂十善法五戒八戒十戒六波羅蜜戒是
人復行十善若一劫二劫三劫修十信受六
大果報上善有三品上品鐵輪王化

中品粟散至下品人中王具足一切
無量善業亦退亦出若值善知識學佛法若
一劫二劫方入住位若不介者常沒不出住
退分善根如上說

佛子發心住者是上進分善根人若一劫二
劫一恒二恒三恒佛所行十信心信至寶常

住八萬四千般若波羅蜜一切行一切法門
皆習受行常起信心不作邪見十重五逆八
倒不生難處常值佛法廣多聞慧多求方便
始入空界住空性位故名爲住空理智心習
古佛法一切功德不自造心生一切功德故
不名爲地但得名住

佛子治地住者常修空心淨八萬四千法門
清淨鮮白故名治地住佛子長養一切行故名
修行住佛子生在佛家種性清淨故名生貴
住佛子多習無量善根故名方便具足住佛
手成就第六般若故名正心住佛子入無生
畢竟空界心心常行空無相無願故名不壞

住佛子從發心住不生倒不起邪魔不破菩提
心故名童真住佛子從佛王教中生解當紹
佛位故名法王子住佛子從上九觀空得無
生心最上故名灌頂住

是故佛子從灌頂心進入五陰法性空位亦
行八万四千般若波羅蜜故名中行佛子
就中始入法空不為外道邪論所倒入正定
故名歡喜行佛子得常住法化一切衆生皆
得法利衆生故名饒益行佛子於實得法忍
心無我無我所故名無瞋恨行佛子常住功
德現化衆生故名無盡行佛子命終之時無
明鬼不亂不濁不失正念故名離癡亂行佛

字生生常在佛國中生故名善現行佛子
我無我乃至一切法空故名無著行佛子
三世佛法中常敬順故名尊重行佛子
說法授人動成物則故名善法行佛子
二諦非如非相非非相故名真實行

是故佛子從真實心入衆生空無我空
二空
平等無別一觀相一合相學習百千萬億
若波羅蜜空觀故迴易前後心心觀唯明明
寂滅長養上地明觀法故迴因向果復以無
量心不捨不受故十迴向法如是佛子常以
無相心中常行六道而入果報不受而受諸
受迴易轉化故名救護一切衆生離衆生相

適向佛子觀一切法但有受但有有用但有名
念念不住故名不壞迴向佛子三世諸佛法
一切時行故名等一切佛迴向佛子以大願
力入一切佛國中供養一切佛故名至一切
處迴向佛子以常住三寶授與前人故名無
盡功德藏迴向佛子習行相善無漏善而
二故名隨順平等善根迴向佛子以觀善惡
父母無二一相一合相故名隨順等觀一切
衆生迴向佛子常照有無二諦一切法一合
相故名如相迴向佛子以諸法無二般若無
生二諦平等過去一合相現在一合相未來
一合相故名無縛解脫迴向佛子覺一切法

第一義諦中道無相一切法皆一照相故名
法界無量迴向

佛子是三十心義釋無量無邊非一切凡夫
所能思量十方諸佛一切菩薩之所遊路佛
子汝先言云何名地佛言地名持持一切百
方阿僧祇功德亦名生成一切因果故名地
佛子捨凡夫行生在佛家紹菩薩位入聖眾
中四魔不倒有無二邊平等雙照大信始滿
習學無生中道第一義諦觀上至二地三地
乃至第十一地明觀法門心心寂滅法流水
中一相無相二身無方通同佛土故名歡喜地
佛子以正無相善入衆生界現千佛世界六

通變化空同無爲故名離垢地佛子光惠信
忍修習古佛道所謂十二部經修多羅祇夜
毗伽羅那伽陀憂那陀尼陀那阿波陀那伊
帝目多伽闍陀伽毗佛略阿浮陀達摩憂波
提舍以此法度衆生光光變通故名明地
佛子大順無生起忍觀一切法二諦相上觀

佛功德下觀六道衆生大慈觀說法授樂悲
悲觀救三苦衆生大喜觀喜前人受樂大捨觀一
切衆生皆入平等入七觀法故名焰地佛子
順忍修道三界無明疑見一切無不皆空入
辯功德入五明論所謂四辯因果內道外道
辯五論者內外方道因果鬼師無不通達故

名難勝地佛子上順諸法觀過去一切法一合相現在一切法一合相未來一切法一合相法界因緣寂滅無二故名現前地

佛子無生忍諸法觀非有煩惱非無煩惱一
生一滅一果三界最後一身一入一出集無
量功德常向上地念念寂滅故名遠行地佛
子是故菩薩無生觀捨三界報變易果用入
中忍無相慧出有入無化現無常自見已身
當果諸佛摩頂說法身心別行不可思議故
名不動地佛子復入上觀光光佛化無生忍
道現一切佛身故名妙慧地
佛子菩薩入時入中道第一義諦大寂忍

品中行行佛行處坐千寶相蓮華受佛記位
學佛化功二習伏斷大信成就同真際等法
界二諦一相具一切功德入衆生根無量纓
絡功德一時等現一切形相故名法雲地
佛子菩薩卽時住大寂門中品忍觀功行滿
足登大山臺入百千三昧集佛儀用唯有繫
果無常生滅心心無爲行過十地解與佛俱
坐佛坐處其智見二常無常一切法境當知
如佛名爲學佛下地一切菩薩於此菩薩不
能別知於佛名菩薩於下菩薩名佛所以者
何是菩薩以大變力住壽百千万劫現作佛
化初生得道轉法輪入無餘滅度說入法輪

似佛非佛一切佛等故威儀進止一切法同
住是百千三昧中如是佛行故入金剛三昧
一相無相寂滅無爲故名無垢地

佛子妙觀上忍大寂無相唯以一切衆生緣
生善法亦自持一切功德故名佛藏而寂照
一切法自佛以下一切菩薩照寂是故佛子
吾昔第四禪中爲八億梵天王說寂照如來
無色無心而寂照一切法佛子吾今略說義
句爲此大衆開善法行

菩薩瓔珞本業經佛母品第五

尔時敬首菩薩白佛言世尊佛及菩薩二初
照智從何而生寂照照寂之義復云何二諦

法性爲一爲二爲有爲無第一義諦復當云
何佛言佛子所謂有諦無諦中道第一義諦
是一切諸佛菩薩智母乃至一切法亦是諸
佛菩薩智母所以者何諸佛菩薩從法生故
佛子二諦者世諦有故不空無諦空故不有
二諦常介故不一聖照空故不二有佛無佛
法界不變故不空第一無二故不有無佛有
佛法界二相故不一諸法常清淨故不二諸
佛還爲凡夫故不空無無故不有空實故不
一本際不生故不二不壞假名諸法相故不
空諸法即非諸法故不有法非法故不二非
非法故不一佛子二諦義者不一亦不二不

常亦不斷不來亦不去不生亦不滅而二相
即是聖智無二無二故是諸佛菩薩智母佛
子十方無極刹土諸佛皆亦是說吾今爲
此大衆略說明月瓔珞經中二諦要義

尔時敬首菩薩白佛言世尊諸佛菩薩大方
便平等慧照諸法界爲頓等覺爲漸漸覺云何

無明藏與心爲一爲異劫量久近復當云何
佛言佛子汝於過去七佛法中一一已問非
爲不知直爲此大衆十四億人於此法中便
欲得決了故問佛子吾今爲是十四億大衆
以金剛口說決定了義佛子我昔會有一億
八千無垢大士即坐達法性原頓覺無二一

切法一合相從法會出各各坐十方界說菩
薩瓔珞大藏時坐大衆見一億八千世尊名
頓覺如來各坐百寶師子吼座時無量大衆
亦坐一處聽等覺如來說瓔珞法藏是故無
漸覺世尊唯有頓覺如來三世諸佛所說無
異今我亦然

佛子汝先言無明心一者是事不然若解與
無明諸見一相者應無縛解凡佛非二所以
者何煩惱同一體相故何以故而共一心
生滅一時不別不異故佛子若縛解一相者
四大可爲一六味應不異而大異味異故縛
解亦如是佛子一切菩薩爲凡夫時具足一

切結縛而斷時。麤分先去。細分後除。若一心
煩惱一者。不應明闇。有二佛子。復以近況遠
凡夫善心中。尚無不善。何況無相心中。而有
無明佛子。而言善惡一心者。是併沙王國中
外道安陀師。偈明闇一相善惡一心。

佛子。我法正義。而可得言善惡同一行者。有
縛有解。有凡有佛。相續百劫。同一行者。而不
得善惡同一心。古佛常說。無相智火滅無明
闇。而善惡二別。而言同一果者。亦無是處。一
切善受佛果。無明受有爲生滅之果。是故善
果從善因生。是故惡果從惡因生。故名善不
受生滅之果。唯受常佛之果。佛子。若凡夫聖

人一切善皆名無漏不受漏果而言受漏果者佛化衆生行善背惡故緣因而發有漏果報非爲無漏因者無明業受果故是名三受三苦苦行苦壞苦苦受樂受捨受二受善緣因果苦苦惡因果一切皆苦以無明爲本佛子汝先言一切菩薩行道劫數久近者譬如十里二里乃至十里石方廣亦然以天衣重三銖人中日月歲數三年一拂此石乃盡名一小劫若一里二里乃至四十里亦名小劫又八十里石方廣亦然以梵天衣重三銖即梵天中百寶光明珠爲日月歲數三年一拂此石乃盡名一中劫又八百里石方廣亦

然以淨居天衣重三銖。即淨居天千寶光明鏡。爲日月歲數三年一拂。此石乃盡。故名一大阿僧祇劫。佛子劫數者。所謂一里二里。乃至十里石盡。名一里劫。二里劫。五十里石盡。名五十里劫。百里石盡。名百里劫。千里石盡。名爲千里劫。万里石盡。名爲万里劫。佛子一切賢聖入是數量。修一切法門時節。久近得佛果。其數百劫。乃得等覺。若一切衆生入是數者。得佛不久。若不入者。不名菩薩佛子法門者。所謂十信心。是一切行本。是故十信心中。一信心。有十品信心。爲百法明門。復從是百法明心中。一心有百心。故爲千法明門。復

從是千法明心中一心有千心爲万法明門
如是增進至無量明轉轉勝進上上法故爲明
明法門百萬阿僧祇功德一切行盡入此明門
菩薩瓔珞本業經因果品第六

尔時敬首菩薩白佛言世尊賢聖正法已說
具足因果二相復當云何佛言佛子三世諸

佛所行之因所謂十般若波羅蜜是百千万
僧祇功德本佛及菩薩亦攝在中是故十法
爲金剛智慧海藏出一切光明功德之行

佛子十般若波羅蜜者從行施有三緣一財
二法三施衆生無畏戒有三緣一自性戒二
受善法戒三利益衆生戒忍有三緣一忍世

行二忍外惡三第一義諦忍精進有三緣一
起大誓之心二方便進趣三勤化衆生禪有
三緣一定亂想不起二定生一切功德三定
利衆生慧有三緣一照有諦二無諦三中道
第一義諦願有三緣一自行願二神通願三
外化願方便有三緣一進趣向果二巧會
無三一切法不捨不受通力有三緣一報通
二修定通三變化通無垢慧有三緣一無相
智二一切種智三變化智

佛子從十智生一切功德行七財信施慙愧
戒聞慧資用成佛故說財四攝利益軟語施
法同事法辯義辯辭辯樂說辯於此四辯法

中無障無礙故名無礙從無礙智生智故名
依了義經不依不了義經依法不依人依義
不依語依智不依識從智生十力四無所畏
六通三明百萬億阿僧祇功德次第生智能
緣八世諦一切法四諦二諦十二因緣八諦
者諸法緣成假法無我有法相待一切相虛
相續名一空不可得同生集起即法非緣實
實集有名生成法法假造法受名起用名聚
法是故八有為法一切法本智所照處復從
是智能除五蓋貪瞋睡掉疑四食觸識思段
食四生卵生胎生濕生化生十惡五逆八倒
三障八難十三煩惱六道三界六十二見

流四縛四取九惱七識住四結一切所除皆
名不善佛子是十智境所除一切功德皆名
佛因汝應受行

佛子汝先言果者是五賢菩薩修諸道法證
一大果爲法性體其體者非有非無非大非
小非色非心非相非三世非天非人非名字
非常樂我淨非六道非六識入非數量法過
一切法相非福田非鬼非神非動靜非生滅
非第一非五色非六大非土田非法界非三
界非縛解非明闇非得法寂然無爲一切法
外言語道斷心行處滅其處難量就有諦中
修劫量行而有果報

佛子有二法身一果極法身二應化法身其
應化法身如影隨形以果身常故應身亦常
佛子古昔諸佛二身道同佛子一切菩薩二
身俱是無常身佛子一切凡夫亦有二身一
報身二方便身報身不共有方便身共一切
衆生有佛子一切菩薩一切衆生皆有二身

一切諸如來常作如是說故名決定了義
佛子佛義功德身者諸佛道同果法不異所
謂十号一如來二應供三正遍知四明行足
五善逝六世間解七無上士八調御丈夫九天
人師十佛陀具向十德故爲一切衆生之所
供養復次十八不共法所謂身無失口無失

念無失無異想無不定心無不知已捨心念
無減欲無減精進無減智慧無減解脫無減
解脫知見無減身業隨智慧行口業隨智慧
行意業隨智慧行智慧知過去未來現在無
礙無障復有十力是處非處力業力定力根
力欲力性力果力天眼力宿命力結盡力慈
悲喜捨我是一切智人我漏已盡無漏出
煩惱道煩惱障道天身天眼天耳漏盡宿命
他心五眼五分法身無罪三業佛寶法僧滅
諦解脫靈智一乘金剛寶藏法身藏自性清
淨妙藏三達三無爲三明一諦一道獨法大
樂無爲佛子一切聖果無量功德藏中不可

說不可說果是果一道佛子果體圓滿無德
不備理無不周居中道第一義諦清淨國土
無極無名無相非一切法可得非有體非無
體其一照相一合相一體相一覺相淨明無
二佛子是果獨法圓明常住一果體相有無
量義義有無量德德有無量名義果者所謂
滅諦常樂我淨十八不共一切功德皆名義
果故名果果佛子義德名是三皆教化故有
如是三句之義若賢人若一切衆生有解是
三句者是人已爲三世諸佛受佛職位佛子
其果不可說不可知而就名相法中說名相
法是故一果名體義名果果是義果者出圓

果故故名果果佛子吾今說此因果百千萬劫說不可盡汝諸大衆善自受持

菩薩瓔珞本業經大衆受學品第七

尔時敬首菩薩敬礼於諸佛奉承大衆教略問於要義七會之所說信順三寶藏爲法法不絕不爲世名利願令法久住白佛言世尊

佛上已說若因若果若賢若聖一切功德藏今此大衆有十四億那由他人誰能不起此座受學修道從始至終一一具行次第入菩薩位者時釋迦牟尼佛頂髻放一切佛光一切菩薩光復集十方各百億佛土其中佛及菩薩一切皆集已即於是衆中告文殊卽刊

菩薩普賢菩薩法慧菩薩功德林菩薩金剛
幢菩薩金剛藏菩薩善才童子菩薩言汝見
是大衆中敬首甚異能問三觀法界諸佛自
性清淨道一切菩薩所修明觀法門汝等七
菩薩各領百萬大衆應受觀學如是法門佛
子我今便重說如是明觀法門所謂六入次
第道諦聽善思修諸慧戒勅於衆受用伏行
佛子若一切衆生初入三寶海以信爲本住
在佛家以戒爲本佛子始行菩薩若信男若
信女中諸根不具黃門姪男姪女奴婢變化人
受得戒皆有心向故初發心出家欲紹菩薩
位者當先受正法戒戒者是一切行功德藏

根本正向佛道果一切行本是戒能除一切
大惡所謂七見六著正法明鏡佛子吾今爲
諸菩薩結一切戒根本所謂三受門攝善法
戒所謂八万四千法門攝衆生戒所謂慈
悲喜捨化及一切衆生皆得安樂攝律儀戒
所謂十波羅夷

佛子受戒有三種受一者諸佛菩薩現在前
受得真實上品戒二者諸佛菩薩滅度後千
里內有先受戒菩薩者請爲法師教授我戒
我先禮足應如是語請大尊者爲師授與我
戒其弟子得正法戒是中品戒三佛滅度後
千里內無法師之時應在諸佛菩薩形像前

胡跪合掌自誓受戒應如是言我某甲白十方佛及大地菩薩等我學一切菩薩戒法是下品戒第二第三亦如是說佛子是三攝受三種受戒過去佛已說未來佛當說現在佛今說過去諸菩薩已學未來諸菩薩當學現在諸菩薩今學是諸佛正法戒若一切佛一切菩薩不入此正法戒門得無上道果虛空平等地者無有是處

佛告諸佛子今正說正戒善男子善女人當受戒時先禮過去世盡過去際一切佛禮未來世盡未來際一切佛禮現在世盡現在際一切佛如是三禮已法僧亦然佛子復敬受

四不壞信依止四依法從今時盡未來際身
歸依佛歸依法歸依賢聖僧歸依正法戒如
是三說已佛子次當教悔過三世罪若過去
身口意十惡罪願畢竟不起盡未來際若現
在身口意十惡罪願畢竟不起盡未來際若
未來身口意十惡罪願畢竟不起盡未來際
如是悔過已三業清淨如淨琉璃內外明照
即與受十無盡戒汝等善聽

佛告佛子從今身至佛身盡未來際於其中
間不得故殺生若有犯非菩薩行失四十二
賢聖法不得犯能持不其受者答言能佛子
從今身至佛身盡未來際於其中間不得故

盜若有犯非菩薩行失四十二賢聖法不得
犯能持不其受者答言能佛子從今身至佛
身盡未來際於其中間不得故姪若有犯非
菩薩行失四十二賢聖法不得犯能持不其
受者答言能佛子從今身至佛身盡未來際
於其中間不得故妄語若有犯非菩薩行失
四十二賢聖法不得犯能持不其受者答言
能佛子從今身至佛身盡未來際於其中間
不得故酤酒若有犯非菩薩行失四十二賢
聖法不得犯能持不其受者答言能佛子從
今身至佛身盡未來際於其中間不得故說
在家出家菩薩罪過若有犯非菩薩行失四

十二賢聖法不得犯能持不其受者。答言能
佛子從今身至佛身盡未來際於其中間不
得故。慳若有犯非菩薩行失四十二賢聖法
不得犯能持不其受者。答言能佛子從今身
至佛身盡未來際於其中間不得故。瞋若有
犯非菩薩行失四十二賢聖法不得犯能持
不其受者。答言能佛子從今身至佛身盡未
來際於其中間不得故。自讚毀他若有犯非
菩薩行失四十二賢聖法不得犯能持不其
受者。答言能佛子從今身至佛身盡未來際
於其中間不得故。謗三寶。藏若有犯非菩薩
行失四十二賢聖法不得犯能持不其受者。

答言能佛子受十無盡戒已其受者過度四
魔越三界苦從生至生不失此戒常隨行人
乃至成佛佛子若過去未來現在一切衆生
不受是菩薩戒者不名有情識者畜生無異
不名爲人常離三寶海非菩薩非男非女非
鬼非人名爲畜生名爲邪見名爲外道不近
人情故知菩薩戒有受法而無捨法有犯不
失盡未來際若有人欲來受者菩薩法師先
爲解說讀誦使其人心開意解生樂著心然
後爲受又復法師能於一切國土中教化一
人出家受菩薩戒者是法師其福勝造八万
四千塔況復二人三人乃至百千福果不可

稱量其師者夫婦六親得手爲師授其受戒者入諸佛界菩薩數中超過三劫生死之苦是故應受有而犯者勝無不犯有犯名菩薩無犯名外道以是故有受一分戒名一分菩薩乃至二分三分四分十分名具足受戒是故菩薩十重有八万四千威儀戒十重有犯無悔得使重受戒八万四千威儀戒盡名輕有犯得使悔過對手悔滅一切菩薩凡聖戒盡心爲體是故心亦盡戒亦盡心無盡故戒亦無盡六道衆生受得戒但解語得戒不失佛子三世劫中一切諸佛常作是說我今在此樹下爲十四億人說住前信想菩薩初受

戒法佛子是信想菩薩於十千劫行十戒法
當入十住心佛子當先為諸大衆受菩薩戒
然後為說瓔珞經同見同行尔時衆中有百
億人即從座起受持佛戒其名梵陀首王共
無數天子修十戒滿足入初住位

佛子復從是住修行百法觀門所謂十信十
進十發趣十乘十金剛十隨喜十戒十願十
護十迴向以是百法觀達三界空假名皆空
一切法無我無受無因皆無定性即滅十三
縛所謂七見六著如實相入初行位
佛子復從是行觀修千法明門所謂十信乃
至十迴向轉轉入法法無我法集法起法道

法滅皆無人受法法如虛空如幻如乾城始
陽焰一切法無相百千生滅皆不可得入初
迴向位

佛子復從是迴向明明轉照照智學相似平
等觀觀名無得無得假得喻如然燈有炷非
初焰者非初焰有時中有燒非離初焰者非
初焰無時中有燒後亦如之直以有為諸法
二諦皆迭遷假号故燒故知始焰非今今焦
非始今焦非始故於今方有始焰非今故於
今無燒無燒於今今燒假燒得平等觀亦復
如是非初心有中有得亦非初心無中有得
後心亦然故始心非今今起非始起今起

非始起故於今方有始心非今心故於今無得
無得於今今得假得中道第一義諦心念念
寂滅入万法明門從十信乃至十迴向自然
流入平等道無得一相真實觀一照相入初
地道佛子復從是地正觀一照智中入百万
阿僧祇功德法門於一相觀中一時行乃至
第十地心心寂滅自然流入無垢地佛子復
從是地以一照智了一切業因果法界無
不一觀以智知一切衆生識始起一想住於
緣順第一義諦起名善背第一義諦起名惑
以此二爲住地故名生得善生得惑因此二
善惑爲本起後一切善惑從一切法界生善

惑名作以得善作以得惑而心非善惑從二
得名故善或二心起欲界或名欲界住地起
色界惑名色界住地起心或故名無色界住地
以此四住地起一切煩惱故為始起四住地
其四住地前更無法起故故名無始無明住
地金剛智知此始起一想有終而不知其如
前有法無法去何而得知生得一住地作得
三住地三住地唯佛知始知終是無垢菩薩
一切智齊知自地常住第一義諦中自然流
入妙覺海地

佛子住是妙覺地中唯現化可名有無量義
有無量名其出一體所謂妙果常住清淨至

若虛空不可思議不可說不可名數不可名入界分可得

佛子我說菩薩次第第六入法門無量功德如是六入法門一切菩薩無不入者我今此坐有十四億人不離本座入此六入法門佛子我本初得道時在此樹間說十世界海法門

有九十億人亦入此六入明門復主普光法堂說十佛國土有百萬億人入此六入明門復至帝釋堂說十住有五百萬人入此六入明門復至焰寶堂說十行有千萬人入此六入明門復至第四天法光堂說十迴向有十恒河沙人入此六入明門復至第六摩尼堂

說十地有百萬恒河沙人入此六入明門復
至祇洹林說入法界品有十二恒河沙人入
此六入明門今復至此第八會座爲十方無
極大衆敬首菩薩一切衆說六入明門一切
大衆受持若一若二無別

菩薩瓔珞本業經集散品第八

尔時佛告敬首菩薩及此會十四億那由他
人大衆汝聞上四十二賢聖因果明觀法門
一切大衆皆應發三菩提心如是三告佛子
應受應持應發心時諸大衆中有百千天子
聞是法門發初住心捨凡夫法修行伏忍得
入初住明觀法門復有十千信男信女入清

淨行法門復有八万大梵天王得入初光明
觀法門復有八部阿須輪王各捨本形入十
信心修十善行復有八万第十地人現成正
覺佛子尔時十方無極佛刹一切大衆聞佛
說瓔珞中六入法門所謂十住十行十迴向
十地無垢地妙覺地各各發無量菩提心還
歸本國復有無色界色界各各還修神通歸
本所住處轉宣菩薩瓔珞法門化授天人復
有六欲天人還歸本天廣爲諸天人復說本
行無量時諸大衆各各受持讀誦解其義味
還歸本土說菩薩之大行諸佛之本業受持
已竟

尔時佛告文殊師利慧海金剛藏道華等八
千菩薩皆為十方諸佛國中第一弟子汝應
為十方無明衆生受持讀誦解其義味為過
去未來現在一切衆生開空慧道入法明門
尔時有五十大菩薩皆一生補處從座而
起受持佛語經劫不滅復有万梵天王亦即
從座起受持佛語復有無量天女從座而起
受持佛語

尔時他方無極刹菩薩此國菩薩以變化神
通入如幻三昧踊在虛空歡喜無量得聞受
持瓔珞功德經心心受行成佛不捨衆賢聖
門時佛復現百万變化神通無量光明無量

清淨身重囑此金剛藏海瓔珞經汝諸大衆
受持受此經法是經是過去無量百千佛心
中所行法汝等受持供養是時一切大衆一
時從座放千光明照三千大千世界歡喜受
持菩薩不可思議瓔珞經頂受供養禮佛而
退復有六欲天子十千國王聞佛法座離散
一時號泣涕出流慟聲滿三千無不悲泣從
座而去復有八十億大菩薩皆以四無量心
有無一等無爲無相受持佛語各入無盡法
化三昧歡喜而退復有十千始行賢者入九
觀定四禪四空定滅盡定十淨十戒心入定
見道度疑正道行知見行斷知見得入法故

禮佛而退

余時坐中有八千菩薩各從座起一金剛華
菩薩白佛言世尊未來世中說經菩薩法輪
下其聽法者受化奉行法用復當云何佛言
佛子快發斯問佛子先當為聽法者與受菩
薩正法戒然後為說菩薩之本行六入法門
佛子次第為受四歸法歸佛歸法歸僧歸戒
得四不壞信心故然後為受十戒不殺不盜
不婬不妄語不酤酒不說在家出家菩薩罪
過不慳不瞋不自讚毀他不謗三寶是十波
羅夷不可悔法佛子受十無盡戒已復為聽
者教供養法師常以天上無量華香百千燈

明百千天衣瓔珞百千妓樂百味飲食屋宅
經書一切所須之物皆悉給與弘通法師當
如敬佛如事父母如事火婆羅門法如事帝
釋師僧日日三時禮敬爲法捨身沒命乃是
佛子如是求法之人乃可爲說菩薩之大行
百千所佛轉授瓔珞法門時十四億大衆歎
言來來世中無法無三寶無賢人時劫從
世起故其說法者其聽法者甚難甚難復從
座起各各悲泣號聲大慟地轉海波三千倒
覆二十八宿日月不現是時大衆還攝神力
儼然而敬受持讀誦解說義句千劫不滅無
窮無盡各各歡喜奉行作禮而去

菩薩瓔珞本業經卷下

念

佛略

下力遮反

鉢

殊音

掉疑

上徒

炷

炷音

送

徒

結

熈

熈音

消

反

彌

毫

上音

涕

出

上音

慟

洞音

炷

炷音

送

徒

結

熈

熈音

消

